



Cheryl Kubin – S'Gägeteil vo Liecht

S' Gägeteil vo dunkel esch hell
ond s' Gägeteil vo langsam esch schnäll
s' Gägeteil vo deck esch dönn
ond s' Gägeteil vomne Verloscht esch en Gwönn

s' Gägeteil vo breit esch schmal
ond s' Gägeteil vo intensiv esch schal
s' Gägeteil vo wechtig esch banal
ond s' Gägeteil vo liebevoll esch brutal

s' Gägeteil vo höpfe esch chrüüche
ond s' Gägeteil vo iifange verschüüche
s' Gägeteil vo seckle esch schnoogge
ond s' Gägeteil vonere Schönheit en Hoogge

s' Gägeteil vo luut esch liislig
ond s' Gägeteil vo schön esch grusig
aber
esch denn s' Gägeteil vo öppis Schönem wörklech wüescht?

ond was esch s' Gägeteil vo liecht?

s' Gägeteil vo wiit esch nöch
ond s' Gägeteil vomne Tüüf esch es Höch
s' Gägeteil vo schwarz esch wiiss
ond s' Gägeteil vo hervorragend esch miis

s' Gägeteil vode Zuekonft esch d' Vergangeheit
ond s' Gägeteil vo ufegrüehrt esch abegheit
s' Gägeteil vo heiss esch chalt
ond s' Gägeteil vo jong esch alt

s' Gägeteil vo troche esch nass
ond s' Gägeteil vo Liebi esch Hass
s' Gägeteil vonere Bohnestange esch es Fass
ond s' Gägeteil vomene Sans-Papier eini met Pass

s' Gägeteil vo rede esch schwiige
ond s' Gägeteil vo näbenand legge esch biige
aber
onderscheide sech de zäh Schiitli Holz inere Reihe wörkli vonere Schiiterbiig?

ond was esch eilech s' Gägeteil vo Liecht?

S'Gägeteil vo Liecht

s' Gägeteil vo nüt esch öppis,
drom send s' Gägeteil vo Hüenerbröscht au Pöppis

nei, aber - was esch iez s' Gägeteil vo liecht?

s' Gägeteil vo inetue esch useloh
ond s' Gägeteil vo ufego esch abecho
s' Gägeteil vo abgrondtüüfslächt esch fantastisch
ond s' Gägeteil vo verschwomme esch plastisch

s' Gägeteil vo schtellschtoh esch tanze
ond s' Gägeteil vomene Wöschbrättbuuch en Ranze
s' Gägeteil vomene abhörsechere Ruum esch eine met Wanze
ond s' Gägeteil vode Hälfti esch s' Ganze

s' Gägeteil vomene Bär esch es Tal
ond s' Gägeteil vo Gnoss esch e Qual
s' Gägeteil vo i wett das esch mer egal
ond s' Gägeteil vomene Chämmerli en Saal

s' Gägeteil vo flüüge esch abschtörze
ond s' Gägeteil vo verlängerer esch abhörze
s' Gägeteil vomene Gägeteil esch es glichbedütends Wort
ond s' Gägeteil vo ersch grad cho esch scho lang weder fort

ebe, ond was esch iez genau s' Gägeteil vo liecht?

s' Gägeteil vo liecht esch schwär
ond s' Gägeteil vomne Schnägg esch es Gwehr
s' Gägeteil vo ersch grad gsi esch scho so lang här
ond s' Gägeteil vomne schmale Worf esch en grosse, decke Bär

ond was esch denn s' Gägeteil vom Liecht?

esch de s' Gägeteil vom Liecht di absoluti Dunkelheit?
esch s' Gägeteil vonere Mönschemängi di grossi Einsamkeit?
esch denn liecht ned au mängisch wahnsennig schwär?
esch eine, wo voll esch, ned au mängisch egetli läär?
fühlt sech eini, wo gross esch, ned au mol chlii?
ond het dä Tag ned ersch grad agfange, scho escher verbii?

mängisch werds donkel, wägemne helle Liecht,
nämmlig i dem Momänt, wo eim d' Dunkelheit s' Läbe liechter miecht